

<County: Cumberland>

<Code: L1187>

<MS reference: Kendal, Cumbria Record Office, WD/Ry/92/87>

<Text: Enfeoffment>

This indentur mad þe xiiij . daye of Septembr@ þe 3er of þe reigne of kyng henry the sext aftire þe conquest þe xvij be-twene *ser* Thomas lumley kny3t aponne þe ton party & *ser* henr~ Thyrlkeld [kni3t] apon þe tothir~ party beres wytnes þ^t it is accordyd be-twene þe saied *ser* Thomas and *ser* henr~ þe daye and þe 3ere be-fore-saied þat þe saied *ser* henr~ sall infeffe Mald þe systire of þe saied *ser* Thomas ande to hyre gyff sure astatte for terme of hyre lyffe in xx li . rent in lande at ouer all manere of reprises<?> and clerly standynge w^t-owtyne ony rent charge or ony maner of othyr rent oute þar-of issuan or ony maner of astatt or tayll þare-of made by þe qwylke þe saied mald may be interripte ore intrikyde in þe saied rente duryng hyre lyfe And þe saied Malde sall be infeffide in þe sayede lande and rente w^t-in xl dayes next folowinge the date of this indentur~ And þat Feffment done þe saied *ser* Thomas sall gyue sine astatte w^t-in xiiij dayes aftire . [or ellys qwen þe saied *ser* henr~ is redy to ask it] to þe sayd *ser* henr~ yf he be redy to resayue it or haske it by hyme-selfe or ony in his name in xx li . rent in lande at ouer þe reprise standynge cler~ in þe for^ome aboue-sayed to haue to hyme for þe terme of x 3eres bot if þe sayed *ser* Thomas mak hyme full payment of CCC markys w^t-in þe saied 3eres And this to be holdyne and fullfyllled on athyr party athir of thame byndys þame to aythire in CCC li of lowfull mony to pay tyll othyre qwedyr þat fullfyllis not þar connandes be-for-saied And also ir bodyly Sworne aithire to othire if þaie fayll of þaier connandes aboue-sayed to pay þe sayed soume And to wytnes of þe qwylk thinge tyll a part of þis indentur~ aythir~ of þame settys þer seall wrytin þe day and þe 3er abon-sayed